

四庫全書

子部

欽定四庫全書

山堂肆考卷四十四

明彭大翼撰

臣職

叅知政事

歷代沿革後魏古弼為尚書令叅知政事叅知政事之名此其始也宋乾德二年太祖相趙普畏其專將擇官以為副而難其名稱召陶穀問曰下丞相一等有何官對曰唐有叅知機務叅知政事今可用之遂

命薛居正等為叅知政事仍令不押班不知印不升
政事堂止令就宣徽使廳上視事殿庭別設塼位於
宰相後敕尾書銜降宰相數字月俸雜給半之開寶
六年詔薛居正等於都堂與宰相同議公事又詔中
書門下押班知印宜令與居正同知雍熙四年御史
言文德殿常朝百官皆有塼位惟叅知政事未有詔
令依位排砌至道元年詔叅知政事與宰相分日知
印押正衙其塼位先與宰相異今宜合為一竝得升

都堂二年又詔自今叅知政事不知印押班其搏位列宰相後不升政事堂然押勅齊衙行則竝馬至今不易大元尚書省置叅知政事二員為宰相之貳

盛陳節儉

隋蘇威與高潁叅掌朝政見宮中以銀為幔鈎因盛陳節儉之美上為改容雕飾舊物悉命除毀

勸行仁義

唐魏徵字元成貞觀三年以秘書監叅預朝政於是帝

即位四年以來歲斷死罪二十九幾致刑措米斗三錢
夜戶不閉行旅不齎糧取給於道帝謂羣臣曰此徵勸
我行仁義既效矣

忠直勵行

唐戴胄為吏部尚書叅與朝政太宗嘗謂羣臣曰戴胄
於我無骨肉之親但其忠直勵行情深體國事有機要
無不以聞所進官爵以酬厥勞爾

剛毅守節

宋薛簡肅公奎字宿藝拜叅知政事入謝上曰先帝嘗言卿可用吾今用卿矣公感激自勵而素剛毅守節不苟合既與政猶挺立無所牽隨

叅議朝章

魏徵知門下省事詔朝章國典竝許叅議得失他日上宴羣臣曰納忠諫正朕違為國家長利惟徵而已雖古名臣亦何以加親解佩刀以賜焉

通知省事

官制舊典近詔復置叅知政事二員通知三省事

論議明辨

唐蕭瑀叅預朝政論議明辨不能容人之短上嘗謂曰卿守道耿介古無以過然善惡太明或有時而失瑀頓首謝曰既蒙教又許以忠亮雖死日猶生年也

風度端凝

職源宋李沆嘗侍曲宴太宗目送之曰李沆風度端凝真貴人也俄除叅知政事

文詞清麗

翰林盛事唐崔湜初執政年二十七容止端雅文詞清麗嘗出端門下天津馬上自吟曰春還上林苑花滿洛陽城張燕公時為工部侍郎望之嘆曰此句可效位可得其年不可及也

學問該洽

宋賈昌朝學問該洽叅預鈞衡庶績咸秩

不語禁省事

唐楊師道拜侍中叅預朝政親遇甚隆渥然性周慎未嘗語禁省事

頗攻中書短

倦游錄蘇易簡晚年急於進用因召見頗攻中書之短遂叅大政

遇事不依違

言行錄周益公必大除叅知政事上曰近見卿遇事殊不依違執政之於宰相事任非遠自當和而不同公曰

韓琦歐陽修殿上有所爭退則歡然無間最可為法

論事不阿屈

言行錄宋唐質肅公介拜叅知政事與同列論事未嘗
阿屈雖在帝前必究切辨析要是非之歸帝以是益敬
之而天下翕然想望風采一日與諸子曰吾備位政府
知無不言桃李固未嘗與汝栽培而荆棘則甚多矣

面折利用

言行錄宋魯肅簡公宗道立朝剛正嫉惡少容在政府

七年務裁抑僥倖不以名器私人樞密使曹利用恃權驕橫公屢於帝前面折之時貴戚用事者目為魚頭叅政因其姓且言骨鯁如魚頭也

面折賈琰

職源宋竇偁與賈琰同事太宗府中太宗嘗與諸王射琰稱贊而多矯誕偁叱之太宗不樂因罷會白太祖出偁涇州後為叅知政事太宗謂曰卿何以至此曰陛下以藩邸舊恩太宗曰非也卿嘗面折賈琰賞卿之直耳

輪員押麻

淳熙玉堂雜記凡鎖院文臣職事官承務郎釐務官通直郎以上明日赴文德殿聽麻宰相樞密皆不往惟輪叅政一員押麻麻卷自內出閣門啟御封兩吏對展宣贊舍人南面搢笏叉手摘首尾詞及階官姓名下數句大聲讀之不盡宣也聽訖閣內官以授叅政叅政付中書吏百官不拜而退若大詔令及冊后之類則宰相文武百僚俱入

輪日知印

會要至道元年詔曰自今叅知政事宜與宰相輪日知印押正衙并得升都堂

勞過學士

東齋記事宋孫夢得為叅知政事曰俸祿差厚耳與學士亦不甚相遠但清優不如學士而勞責過之

職均宰相

丁未錄張方平除叅知政事制叅議大政雖下丞相一

等至於坐斷廟堂之論上則幹元元以調四時下則壅
至仁澤萬類近則羣臣仰首以承德遠則殊俗交臂以
待命蓋與宰相之職業均矣

不禁朋黨

涑水記聞宋慶厯四年上與執政論及朋黨事叅政范
仲淹對曰自古以來正邪在朝未嘗不各自為一黨不
可禁也在聖鑒辨之耳誠使君子相朋為善於國家何
害

上薦人材

言行錄趙忠簡公鼎字元鎮召還除叅知政事上令鼎薦人材公即以朱震范同呂祉陳橐呂本中林季仲董茶上之

天章閣條事

言行錄范文正公叅知政事每進見必以太平責之既而再賜手詔趣使條天下事又開天章閣召見賜坐授以紙筆使疏於前公退而條列所宜先十數事上之公

每取班簿見不才監司姓名一筆勾之以次更易富鄭公謂公曰一筆勾焉知一家哭公曰一家哭何如一路哭

天章閣觀書

言行錄宋元憲公庠帝召二府天章閣觀書因問天下利病事公時叅知政事獨進曰臣等願至中書條上既退草數千言奏之後皆施用

同議都堂

宋開寶六年六月詔叅政薛居正呂餘慶於都堂與宰相趙普同議公事

權兼密院

言行錄趙鼎上言仁宗時陝西用兵令宰相兼樞密院今臣既兼叅預政事亦令權兼樞密則事體歸一無前人所調密院調兵而三省不知三省財竭而密院用兵不止者矣

賜及其母

事略宋賈黃中兩受詔知貢舉多簡拔寒俊號為無私
又掌吏部選事品藻精當上益知其才拜給事中叅知
政事召見其母王氏賜坐與詔曰教子如此真所謂今
之孟母也因賦詩以美之賜予甚厚

恩加其父

春明退朝錄叅知政事盧朱崖吳正肅與尚書張公安
道樞副陳堯叟張文孝吳文肅等朝廷多優厚之加其
父恩命焉

奉事寇準

宋張洎為給事中叅知政事與寇準同列先是準知吏部選事洎掌考功為吏部官屬準年少新進氣銳思得老儒附以自大洎夙夜坐曹每冠帶候準於省門揖而退不交一譚準益重之及既同秉大政準頗忌之洎奉事寇準愈謹政事一決於準無所叅預

救解多遜

宋李昉素與盧多遜善待之不疑多遜知政事譖昉於

上前人有言於昉昉曰盧與我厚不當爾後盧貶昉知政事上言及盧事昉頗排解之上因言盧多遜尋常毀卿不值一錢昉始信人言不誣上由此益重昉常目之為善人

中書令

歷代沿革周官內史掌書王命即其任也漢有中書謁者令丞自武帝遊宴後庭公卿不得入始用宦者典尚書謂之中書謁者置令僕射元帝遂委以政事

成帝罷中書宦者更以士人為之魏黃初改中書令為秘書改令為監典尚書奏事東晉更重其職宋齊後魏亦置監令後周依周禮春官府置內史中大夫二人蓋比中書監令之任後又增為上大夫隋文帝廢三公府僚命中書令與侍中知政事遂為宰相之任煬帝改為內書令唐武德初又改為內史令後又改為中書令龍朔二年改為西臺右相光宅二年改為鳳閣內史開元初改為紫薇令宋中書令正一品

以檢校官兼中書令謂之使相太祖太宗時加中書
令者惟趙普一人大元中書省有中書令乃宰相之
職掌丞天子平章萬幾

鳳閣鸞臺

自隋唐以來除改百官必有詔勅而其制蓋須由中書
門下省故劉禕之云不經鳳閣鸞臺何謂之勅

銅印墨綬

晉制中書令銅印墨綬進賢兩梁冠絳朝服佩水蒼玉

乘輅車

左右曹

應劭漢官儀中書省分左右曹受尚書事前世文士以
中書在右因謂中書為右曹又中書省與尚書省門下
省謂之三省尚書省為南省門下中書省為北省又謂
門下尚書省為左省中書省為右省又謂之西省西掖
內樞綸閣紫薇省故白居易詩今年寒食夜西省鳳池
頭徐公幹詩誰謂相去遠隔此西掖垣

東西臺

唐龍朔中改左右曹為東西臺又宋治平二年祖無擇言門下中書與尚書省其長官皆宰相之任今乃左省在右省在東不可乞將中書省與門下省對移

雞樹

魏晉世語劉放孫資共典樞要夏侯獻曹肇心內不平殿中有雞棲樹二人相謂曰此亦久矣其能復幾蓋指中書監劉放中書令孫資也文選鳳池清切雞木深嚴

鳳池

通要中書省地在樞近多承寵任是以人皆固其位為
鳳凰池晉荀勗自中書監遷尚書令人賀之乃發恚曰
奪我鳳凰池諸君何賀之有

一朝大手

唐大詔令武德開元中有陳叔達蘇邕等為大手筆掌
書王命故一朝言語煥然成文

奕世令聞

晉陽秋中書令王獻之卒以王珉為中書令世稱大王
令小王令珉父洽永和中嘗為中書令至此珉復繼父
為之人以為奕世令聞

妻子不粒

北史魏高允字伯恭拜中書令歷事五帝出入三省五
十年司徒陸麗曰高允雖蒙寵待而家貧妻子不粒魏
主即日幸其第惟有草屋數間布被縕袍廚中鹽菜而
已魏主嘆息賜以粟帛拜其子悅為郡守允固辭不許

帝重允常稱為令公而不名

父子相失

唐崔湜拜中書令時父挹為吏部尚書性貪數為人請託以干湜湜多不從由是父子相失玄宗在東宮時數幸湜第申款密

中書五郎

晉陳淮為中書令張華為監淮與華俱處機密而推崇之每至直詔書無大小必先示華華得詔書則不復示

淮省中號淮為中書五郎

令公四俊

唐張嘉貞為中書令引進苗延嗣呂太一員嘉靖崔訓
四人皆位清要四人頗招權時人語曰令公四俊苗呂
崔員

專車

曹嘉之晉記中書監與中書令舊例同車入朝至和嶠
為令而荀勗為監嶠性強抗專車而坐乃使監令異車

自此始也

隔坐

吳錄紀鴈字子上景皇時鴈父亮為尚書令鴈為中書令每朝會詔以屏風隔其坐

文本不受賀

唐太宗以岑文本為中書令還家有憂色母問其故對曰非勲非舊濫荷寵榮位高責重所以憂懼語賀客曰今受弔不受賀也

至忠不詭隨

唐蕭至忠為中書令時宗楚客懷奸植黨而韋巨源楊再思李嶠務自安全無所弼正至忠介其間獨不詭隨時望翕然歸重

參掌文翰

職官分紀唐肅宗時徐浩拜中書令屬詞贍給文工楷隸上悅其能加兼尚書右丞玄宗傳位誥冊皆浩為之對掌文誥

唐張九齡號一代詞宗為中書令引韋陟為中書舍人
與孫逖梁涉對掌文誥時人以為美譚

言語辨捷

吳張尚有俊才孫皓時為侍郎以言語辨捷見知擢為
侍中中書令

風儀秀逸

後魏任城王澄為中書令蕭順使庾華來見澄音韻清
雅風儀秀逸謂主客郎中張尋曰往謂任城以武著稱

今乃以文見美也

無經濟意

唐穆宗時裴度徙東都留守加中書令時閹豎擅威天子擁虛器縉紳道喪無復有經濟意乃治第東都集賢里穿山鑿池竹木叢萃又於午橋庄創別墅起涼臺煥館號綠野堂與白居易劉禹錫為文章友把酒窮晝夜相歡不問人間事

有刀筆才

吳薛瑩條列吳事曰胡中意性意調美心識解暢有刀
筆才閑於時事為中書令雖不能有所匡矯亦不能苟
求容媚

特賜錦袍

唐魏元忠兼中書令請歸鄉拜掃特賜錦袍一領銀千
兩并給千騎四人充其左右

命停嚴鼓

唐太宗車駕征遼中書令岑文本卒帝親臨視撫之流

涕其夕帝聞嚴鼓三聲曰文本殞逝情深惻怛今宵夜
警所不忍聞命停之


執政事筆

唐舊制宰相議事門下省號政事堂至裴炎為中書令
以中書令執政事筆故徙政事堂於中書省

撰封禪頌

唐玄宗東封還張說為尚書右丞兼中書令詔說撰封
禪頌刻之太山以誇成功初源乾曜不欲封禪說固請

乃不相平及升山執事官當從者說皆引所私超階五
品衆怨其專



山堂肆考卷四十四

欽定四庫全書

子部

山堂肆考卷四十五

詳校官中書_臣孫溶

主事_臣祁韻士覆勘

總校官降調編修_臣倉聖脉

校對官主事_臣陳墉

謄錄監生_臣金拱閭

欽定四庫全書

山堂肆考卷四十五

明

彭大翼 撰

臣職

中書舍人

歷代沿革周禮地官有舍人士士二人掌宮中之政
舍人之名始於此漢置中書舍人尚書郎直宿建禮
門奏事明光殿下筆為詔誥出語為詔令乃中書舍
人也魏初置中書通事一人主呈奏晉初置舍人一

人東晉合通事舍人二職謂之通事舍人南宋初置
通事舍人四員入直閣內梁多以他官兼領後除通
事字直曰中書舍人魏晉以來詔誥皆掌於中書令
及中書侍郎自是皆舍人專之後魏有舍人省後周
置小史上士二人隋置內史舍人八員煬帝減四人
後改為內書舍人唐武德中改為中書舍人置六員
龍朔中改西臺舍人光宅中改鳳閣舍人開元中改
為紫薇舍人宋初中書舍人為遷官實不任職後復

置知制誥及直舍人院元豐五年曾鞏陸佃並試中書舍人自是始正官名又故事舍人年久者謂之閣老中書舍人知制誥謂之外制凡不由三事直拜中舍者謂之撻額裏頭

獨直兩省

唐權德輿字載之為起居舍人歲中兼知制誥進中書舍人獨直兩省數日一還舍

分押六司

唐職林唐武德三年中書舍人置六員以一人知制誥
顯進畫給食於政事堂其餘分署制勅以六省分押尚
書六曹又云分押六司佐宰相判案同署

彥士

魏徐邈補中書舍人多所匡益歷事四世憂國忘私國
之良臣時之彥士

清官

南越志南詔謂詞臣為清平官

賜以古物

南齊傅昭為中書通事舍人時居此職者皆權傾天下
獨昭廉靜無所干預器服率陋明帝聞之賜漆合竹盤
勅曰卿有古風故賜以古物又言行錄宋彭汝礪元祐
中拜中書舍人賜服金紫以為有古人風

不接私財

唐敬宗初登極拜路隋為中書舍人人有以金帛謝除
制者叱而却之曰吾以公事接私財耶終無所納

獨成於心

職林梁裴子野為中書舍人掌詔誥或問其為文敏速者子野答曰人皆成於手我獨成於心

皆成其手

唐顏師古遷中書專掌機密時軍國多務凡制誥皆成其手冊奏之工時無及者

撰五經

徐邈在西省撰正五經音釋學者宗之

稱三字

宋陳后山詩一官早要稱三字注云三字謂知制誥又王禹偁詩云摘毫早要居三字出郡終須借一麾

紅藥

謝玄暉直中書省詩紅藥當堦翻蒼苔依砌上又歐陽公回吳舍人書紅藥翻堦直禁垣之清切紫荷持橐擁法從以雍容

紫薇

白居易詩絲綸閣下文章靜鐘鼓樓中刻漏長獨坐黃
昏誰是伴紫薇花對紫薇郎又岑參西掖郎事詩西掖
重雲開禁署北山疎雨點朝衣千門柳色連青瑣三殿
花香入紫薇故中書省謂之紫薇省又舍人院志中書
省有柳樹建中末枯死興元中車駕還京其樹再生人
謂之瑞柳呂渭為禮部侍郎試進士取瑞柳為題上聞
而嘉之

各住一省

齊永平初中書通事舍人四員各住一省時謂之四戶
權傾天下與給事中為第一流

分領六房

宋元豐間詔中書舍人分領六房隨所領命詞後復分
目

朝廷盛選

通典唐自永淳以來臺閣髦彥無不以文章達故中書
舍人為文士之極任朝廷之盛選諸官莫比焉

文章宿老

唐李嶠字巨山為鳳閣舍人富才思文冊大號令多嶠為之然其任前與王勃楊炯相接中與崔融蘇味道齊名及諸人沒嶠為文章宿老一時學者取法焉

焚制草

職林高郢為中書舍人九年家無制草或問之曰前輩皆有制草公獨焚之何也答曰王言不可藏於私室

掃尺書

蘇東坡元祐初為中書舍人上賜御書紫薇花詩一首坡進詩落句云小臣願對紫薇花試掃尺書招贊普

蘇賈文詞

唐賈會開元初拜中書舍人與蘇縉同掌制誥皆以文詞稱時號蘇賈

常楊詔誥

唐楊炎為中書舍人與常袞並掌綸誥袞長於除書炎長於德音自開元以來詔誥之美時稱常楊

封敕警句

唐封敕為學士拜中書舍人文思敏速武宗深重之嘗
草陣傷邊將詔警句云傷居爾體痛在朕躬帝覽而善
之賜之宮錦

蘇軾至言

宋御史呂陶劾司農少卿范子淵修堤開河糜費巨萬
而功不成黜知峽州中書舍人蘇軾草制曰汝以有限
之財興此必不可成之役驅無辜之民置之決不可生

之地時以為至言

論援古誼

唐齊澣字洗心開元初姚崇為相用為給事中中書舍人論駁及誥詔皆援準古誼朝廷大政必咨之時號解事舍人

文有古風

唐穆宗立每言王仲舒之文有古風最宜為誥召為舍人既至視同列率多新進少年居不樂曰豈可復治筆

硯於其間哉

裴度懿文

唐順宗除裴度中書舍人制度以茂學懿文潤色訓誥
施之四方朕命惟允況中立不倚道直氣平介然風規
有光近侍臺官滿歲班列當遷綸閣之職其所宜授

裴垪精鑒

唐裴垪為中書舍人李吉甫執政以情謂垪曰比日人
物吾惜不及知公有精鑒為我言之垪即疏三十許人

吉甫薦於朝

發彩浮香

文粹唐張鷟奏曰曳裾紫禁伏奏青規助朝廷之光輝
贊明時之喉舌芝泥發彩宣鳳藻而騰文蘭檢浮香潤
龍縑而動色注云內禁地以青規畫之故曰青規漢儀
天子制詔以蘭英為檢紫芝為泥黃縑為制勅也

芟繁剗弊

白居易集元稹舍人制芟繁詞剗弊句使吾文章言語

與三代同風引之而為綸綍垂之而為訓誥秉筆者莫敢爭能

上五事

唐高馮為中書舍人列上五事

發十難

唐高厚穆宗時為中書舍人時張平叔以便佞進欲耀鹽處厚發十難以詰之帝乃知其害民平叔始見疎斥

一人辦事

唐孫處約為中書舍人累年中書令杜正倫奏請更授一舍人與處約同知制誥高宗曰處約一人足辦我事何須多也

四員入直

南宋初復置通事舍人四員入直閣內出宣詔命凡有陳奏皆舍人特入叅決自是中書侍郎之權輕矣

五花判事

唐故事中書省有軍國政事則中書舍人各執所見雜署其名謂之五花判事。中選一人明達練事者知機密謂之解事舍人。

五案掌事

續會要元豐五年曾鞏陸佃並試中書舍人自是始正官名遂以中書舍人判後省之事分案五曰上案掌冊禮及朝會所行之事曰下案掌受付文書曰制誥案掌書記制詞及試吏校其功過曰諫官案掌受諸司關報

文書日記注案掌錄記注其雜務則隨所分案掌之

文思溫雅

唐王仲舒自職方郎中知制誥文思溫雅制誥所出人
皆傳寫

詞旨豐美

唐許景先為中書舍人以文翰見稱中書令張說嘗稱
曰許舍人之文雖無峻峰激流蘄絕之勢然詞旨豐美
得中和之氣

有元白風

謝絳字希深權知制誥文章典雅有元白風元白謂元稹白居易也

有常楊風

宋鄭戩字天休因文定公李廸薦其才累知制誥訓詞溫雅有常楊風常楊即前常袞楊炎也

諍臣風

唐柳公權為中書舍人充翰林書詔學士文宗在便殿

語及漢文恭儉帝舉袂曰此衣澣濯者三矣公權曰人主當進賢退不肖納諫諍明賞罰此澣濯之衣乃小節耳文宗翌日降制以公權為諫議大夫知制誥學士如故謂曰極知舍人不合作諫議以卿言事有諍臣風采也

宰相器

後周范質加中書舍人每朝廷遣使齎詔處分軍事皆合機宜周祖問誰為此辭使者以質對周主嘆曰宰相

器也

百緒無差

唐蘇頲字廷碩為中書舍人時父瓌同中書門下三品父子同在禁篋朝廷榮之玄宗平內難書詔填委獨廷碩在太極後閣口所占授功狀百緒輕重無差書史白曰弓公徐之不然手脫腕矣李嶠曰舍人思如湧泉吾所不及

一字不易

唐孫逖典詔誥為代言最張九齡視其草欲易一字卒不能也又唐馬周字賓王為中書舍人岑文本稱馬君論事援引事類商確古今舉要刪繁會文切理一字不可增減聽之靡靡令人忘倦

父子繼美

唐賈至字幼隣天寶末為中書舍人肅宗即位於靈武上皇遣至為傳位冊文上皇覽之嘆曰昔先帝遜位於朕冊文則卿之先父所為今朕以神器大寶付儲君又

卿為之兩朝盛典皆出卿父子之手可為繼美矣至父
名會河南洛陽人

父子繼任

宋王旦拜右正言知制誥父祐以清名久掌書命不十
年旦繼其任時論美之錢若水有精鑒與之同列每曰
王君凌霄聳壑梁棟之材非吾所及也

叔姪對掌

唐封敖傳封氏自太和以來世居兩制封舜卿從子德

昭時為翰林舜卿時為中書舍人叔姪對掌誥命當時
以為榮

兄弟相代

唐常思謙二子曰承慶曰嗣立承慶為鳳閣舍人武后
謂嗣立曰爾父嘗稱二子忠孝今使卿兄弟自相代即
拜嗣立代兄為鳳閣舍人

問古今事

唐崔琳明於政事開元中與高仲舒同為中書舍人侍

中宋璟親禮之每所訪逮嘗曰古事問仲舒今事問琳
尚何疑

當内外制

周益公撰洪适行狀公除中書舍人內直如故時方羽
檄交馳書詔填委或夜召或細札咨訪公獨當内外制
如乞防虞海道降詔親征多出公手大用之意已定

八年獨掌

職官分紀權德輿四歲能為詩後為中書舍人居西掖

八年獨掌者數歲

十年正任

職官分紀張洎計偕之歲首謁韓熙載一見待之如故
舊謂洎曰子好一中書舍人頃之韓主文柄洎亦登第
不十年間果正綸閣之任

海內共推

唐虞世南拜內史舍人柳渾博學罕所推許至是與世
南相見嘆曰海內當共推此一人又鄭畋為中書舍人

咸通十年討徐方書詔旁午畋洒翰泉湧動無滯思同僚閣筆推之又陸扆拜中書舍人文思敏速揮翰如飛同僚共推其能

天下獨步

宋王禹偁字元之能屬文太宗方獎拔文士召拜右拾遺禹偁上端拱箴以為誠尋知制誥上嘗稱之曰王禹偁文章當今天下獨步

五吏分占

唐王勃長壽中為鳳閣舍人五王出閣有司具儀忘載冊文勃召五吏執筆分占其辭粲然

六親相賀

宋太宗嘗云朕聞朝廷每除一舍人六親相賀諺云一佛出世

進藥石言

見賞賜

倡封禪議

唐張說進中書舍人倡封禪議因詔諸儒草儀多所裁
正

俊瞻無敵

蘇頲為中書舍人工文辭張九齡嘗覽頲文卷謂同列
曰蘇生之俊瞻無敵真文陣之雄帥也

典雅得體

宋神宗實錄劉敞字原父在西掖時一日進封皇子公
主九人敞將下直為之立馬却坐一揮九制幾數千言

文辭典雅各得其體

潤色王度

李吉甫制詞鼓三變之文潤色王度

對草帝綸

王安石題中書院壁夜開金鑰詔詞臣對御抽毫草帝
綸須信朝廷重儒術一時同榜用三人

回五字妙

裴休制詞綸閣回五字之妙又王澹自中書除待制詞

禁垣揮翰五字日宣按魏晉世語司馬景王命中書郎
虞松作表再呈不可意令松更定之經時竭思不能改
中書郎鍾會察有憂色問松松以實對會取草視為定
五字松悅服以呈景王景王曰不當爾耶松曰鍾會所
為也王曰如此可大用真王佐才也

成一家言

唐楊嗣復除中書舍人制貞元中汝父為中書舍人甚
稱厥職今使汝繼父書命成一家言堂構國華在於此

舉按於陵嗣復之父

屢進讜言

唐蘇晉先天中為中書舍人屢進讜言天子嘉允

請復古制

宋劉攽字貢父元祐中拜中書舍人請復古制建紫微

閣於西省

斷憲取本

唐職林楊滔為中書舍人時催作制勅令史將鑰匙出

無本可檢乃斲窻取得本時號斲窻舍人

閉戶精思

國史至道中和嶠知制誥嶠之直中書也每草詔必閉戶精思徧討羣籍而後成一日沙州表求經藏碑詔嶠撰以賜之嶠遣廝借佛書數千卷人以為笑

世稱三才

北史魏收字伯起漢魏無知之後兼中書舍人與溫子升邢子才齊譽世稱三才

時號七字

呂湊開敏善議論一時名輩推許然喜自貴重見賓客不及數言時號七字舍人云

擇笏勉絳

見碑

賜燭送獬

丁未錄宋神宗夕時召知制誥鄭獬對內東門小殿命草吳奎知青州及張方平叅知政事制草畢賜雙燭送

獬歸舍人院二府無知者明旦進草遂付中書出誥按
獬字毅夫

始領外藩

四朝會要雍熙四年以右補闕知制誥范景仁為工部
郎中知京兆府知制誥出領外藩自此始

始除簽書

朝野雜記中書故事小兩制未有除執政者乾道二年
蔣子禮芾始自中書舍人除簽書樞密院事

命典箋奏

宋曾鞏字子固元豐中為中書舍人時哲宗為延安郡王命鞏典王府箋奏故事翰林掌之上特命鞏

不試文辭

言行錄宋陳文惠公堯佐天聖初知制誥故事舍人兼知制誥先試其文辭天子以公文辭天下皆知不復命試自國朝以來不試知制誥者惟楊億及公二人而已又歐陽歸田錄有國以來不試而命者三人楊億陳堯

佐及脩忝其一爾

經宿撰碑

見碑

盡漏授草

言行錄曾鞏擢中書舍人屬新官制遂掌書命舊舍人無在者已試即入院方除目填委鞏占紙肆書若不經意午漏盡授草院吏上馬去除吏日至數十人皆本原職守而為之訓勅者人人不同咸有新趣而衍裕雅重

自成一家論者謂其有三代之風或又謂其文章與歐陽齊名

閣長壓角

朝野雜記舍人院每知制誥上事設紫褥於庭面北拜聽閣長立褥之東北隅謂之壓角長常袞作掖垣叢誌而不解其事按舊唐書亦無聞焉唯裴廷裕正陵遺事云舍人上事宰相當壓角則其禮相傳自唐也

天子篆榜

宋仁宗實錄寶元元年七月新作舍人閣上親篆其榜
曰紫薇閣

失卻君房

湘山野錄宋真宗時日本國入貢求本國神光寺記舍
人文不工令學士張君房代之張退食多潛飲市樓掖
垣求之不得大窘時种放以司諫歸華山後錢希白楊
大年二公為閑忙令楊曰世上何人號最閑司諫拂衣
歸華山錢曰世上何人號最忙紫薇失却張君房

笑卻侂冑

宋林大中遷中書舍人風裁如臺中時韓侂冑來見公接之無他語及侂冑使人通問因願內交又笑卻之

繳還詞頭

龍川志宋富鄭公知制誥制下日遂有封命鄭公繳還詞頭封命遂寢唐制唯給事中得封還詔書中書舍人繳詞頭蓋自鄭公始舊制執政除罷皆宣麻時呂惠公弼因爭新法求去王安石陰沮之乃使舍人院命詞蔡

齊時掌外制乃繳詞頭舉故典論之又熙寧中李定除御史中丞宋敏求蘇頌呂大臨俱為中書舍人封還詞頭世稱熙寧三舍人

不草除制

宋劉敞知制誥宦者石金除觀察使公封還詞頭不草制其命遂止

抑中人進官

宋楊誠齋撰胡澹菴行狀胡銓兼中書舍人有旨以中

人李綽等嘗典發軍書無誤各進官一列公不奉詔綽等泣訴上曰胡銓不肯

繳內侍升職

樓攻媿撰行狀陳傅良字君舉除中書舍人封還詞頭遇事輒發宦者陳源除內侍省押班公執奏再三終不奉詔此一事凡在廷之臣無敢撓其鋒者公獨神色不動來則繳奏旁觀者為之寒心

陪扈屬車

楊文公集三殿內朝日趨蹌於文陛六飛法從時陪扈
於屬車常瞻咫尺之光專裁寬大之詔

宣傳號令

元文遙敏慧夙成仕齊授中書舍人宣傳文武號令楊
遵彥曰堪解穰侯印者必在斯人

二使並擢

宋元豐七年十月詔起居郎楊景畧左司郎中錢勰免
試並為中書舍人時二人奉使高麗方還在道並擢之

三世皆居

唐孫簡知制誥進中書舍人初遯掌誥至代宗時族祖宿又居是職逮簡凡三世矣

易服入酒肆

歸田錄魯宗道易服飲酒於仁和肆中一日真宗急召將有所問使者於酒肆得之曰上問以何事對幸先見教公曰以實對中使入上果問具如公對上後問宗道曰何私入酒家公謝曰臣適有親客遠來家貧無器皿

酒肆百物俱備遂與飲臣且易服市人無識臣者上笑曰卿為宮臣恐為御史所彈也後上為明肅言羣臣可大用者數人公其一也後公竟拜中舍

引裾至御屏

宋光宗制於李后久不朝重華宮會九月重明節羣臣連章請過宮不聽給事中謝深甫言父子至親天理昭然太上之愛陛下猶陛下之愛嘉王太上春秋高千秋萬歲後陛下何以見天下帝感悟趣命駕往朝帝出至

御屏李后挽留帝入曰天寒官家且飲酒百僚侍衛相
顧莫敢言中書舍人陳傅良趣進引帝裾請毋入因至
屏後后叱曰此何地秀才欲斫頭耶傅良痛哭於庭后
使問曰此何理也傅良曰子諫父不從則號泣以隨之

山堂肆考卷四十五

欽定四庫全書

山堂肆考卷四十六

明 彭大翼 撰

臣職

樞密院

歷代沿革唐代宗永泰中置內樞密使始以宦官董
廷秀為之初不置司局但有屋三楹貯文書而已其
職掌惟承受表奏若人主有所處分則宣付中書門
下施行元和中劉光琦等為樞密使長慶中王守澄

知樞密事舊左右軍容多人為樞密亦無視事之廳
後僖昭時楊復恭西門季玄欲奪宰相權乃於堂狀
後貼黃指揮公事後梁革唐世宦官之弊開元中改
樞密院為崇政院命敬翔為使始更士人然未始專
行事於外也唐莊宗同光元年復以崇政院為樞密
院命宰相郭崇韜兼樞密使又置院使一人然權倖
宰相矣晉天福中以桑維翰知樞密院事四年廢樞
密院開運中復置周顯德中范質王溥並叅知樞密

事宋朝樞密院與中書對持文武二柄號為二府太平興國四年以石熙載為樞密直學士以簽書院事簽書之名始此淳化三年以張遜知院事溫仲舒寇準同知院事同知之名始此治平中以郭逵同簽書院事同簽書之名始此慶歷二年西方用兵富弼言邊事繫國安危不當專委樞密宜使宰相兼領於是宰相呂夷簡判院事或又言二府體均判名則太重改夷簡兼樞密使

東院行印

後唐樞密使凡東西院二員宋朝亦有東西院但行東

院印

西府爭事

宋韓魏公別錄慶歷中公與范希文富彥國同在西府
爭事上前議論各別下殿各不失和氣如未嘗爭也當
時相善三人正如推車子蓋其心主於車可行而已不
為已也按宋初循唐制即中書省之北置樞密院元豐

中改制遂於中書省西置院故曰西府

分領政事

呂源明家塾廣記郭崇韜安重誨為樞密使始分領政事不由中書直行下者謂之宣如中書之勅小事則發頭子擬堂帖也至今樞密院用宣及頭子

專掌兵權

宋李綱除知樞密院奏祖宗之法樞密院專掌兵籍虎符三衙管軍諸路帥臣主兵柄各有分守所以維持軍

政萬世不易之法也

降麻閣門

唐僖宗乾符六年以李順融為樞密副使降白麻於閣門出案與將相同

宣麻公朝

續翰林志舊例樞密使未帶使相者不宣麻至周太祖初在潛邸歷試是任乃宣制於公朝今之宣麻自周太祖始

令讀章奏

後唐明宗不知書每四方章奏令樞密使安重誨讀之而重誨於文義多不能曉

命讀軍誡

宋太平興國八年王顯充樞密使上召謂曰卿代非儒門必寡學問今在朕左右典掌萬幾固無暇博覽羣書因命左右取軍誡三篇賜之曰讀之可免面墻矣

案前受事

唐大中故事入對延英兩中尉先降樞密使候旨殿西
宰相奏事畢然後案前受事

帳中問計

後唐莊宗即位郭崇韜為樞密院使時李紹宏請棄鄆
州與汴人盟以河為界莊宗不悅獨卧帳中召崇韜問
計崇韜曰陛下親御六軍直指大梁汴城兵必望風自
潰若偽主授首賊將自然倒戈半月之間天下必定莊
宗蹶然而興曰正合吾意莊宗入汴皆崇韜之謀也

財助賞給

後唐郭崇韜為監修國史兼樞密使初崇韜收汴洛稍
通賂遺親友或規之崇韜曰余備將相祿賜巨萬何愛
於此但偽梁之季賄賂成風今西方侯藩多梁之舊將
皆吾射鈎斬祛之人也一旦革面化為吾人堅拒其請
得無懼乎吾特為國家藏之私室耳及將祀南郊崇韜
悉獻家財以助賞給

筆識將佐

宋劉忠肅公珙字共父乾道三年擢同知樞密院公自以本兵柄則諸將之能否不可不周知乃自諸管軍統領下至裨將佐日召三四人與語得其材用所宜輒筆識之以待選用

戒軍剽掠

郭崇韜為樞密使從魏王平蜀大軍入西川城戒諸軍剽掠法令嚴峻取民一錢者必論之以法市不改肆

冀軍稟畏

五代史初周太祖之將鎮鄴也蘇逢吉請落樞密使曰樞密之任方鎮帶之非便史洪肇曰方鎮兼帶樞密所冀諸軍稟畏耳逢吉曰以內制外則順以外制內豈得便耶事雖不從物議多之

居翰改詔

五代史後唐張居翰同光中為樞密使偽蜀王衍既降詔遷其族於洛陽時關東已亂莊宗慮衍為變遣中官齎詔殺之詔曰王衍一行並宜殺戮其詔已經印書時

居翰在密地覆視其詔乃將行字改為家字及衍就戮止族其家近屬而已其偽官及從行者尚有千餘人皆免枉濫居翰之力也

邦彥獻議

宋高宗紹興中權邦彥獻圖中興十議因以邦彥為簽書樞密院事

翊贊本兵

宋熙寧三年詔國家以西樞內輔翊贊本兵任為重矣

沙汰部吏

宋富弼除樞副上河北守邊十三策大畧以進賢退不肖止僥倖去宿弊為本欲漸易諸路監司之不才者使沙汰所部吏於是小人始不悅矣

攀緣親屬

宋張說妻吳氏太上皇后女弟也說因攀緣親屬擢拜樞府命下朝論譁然未有敢誦言攻之者左司員外郎兼侍講張棻獨上疏切諫且詣朝堂責宰相虞允文復

奏曰文武誠不可偏然今欲右武以均二柄而所用乃得如此之人非惟不足以服文吏之心正恐反激武臣之怒孝宗感悟命遂寢後復用之

厚結家婢

宋仁宗天聖七年以趙稹為樞密副使時政出宮掖稹厚結劉美人家婢以干進用命未下有馳告者稹問東頭西頭蓋意在中書也聞者以為笑談

程松獻妾

宋程松諂事韓侂冑自知錢塘縣不二年為諫議大夫
滿歲未遷殊怏怏乃市一妾獻之名曰松壽侂冑曰奈
何與大諫同名答曰欲使賤名常達鈞聽耳侂冑憐之
遂除同知樞密院事

龐籍汰兵

宋龐頴公籍為樞密使以近世養兵之弊多而國用困
竭於是大加簡閱揀汰為民者六萬餘人減其衣糧之
半者二萬餘人邊儲由是稍蘇焉

不名小吏

宋曹武惠王彬為樞密使帝前密論天下事無不合上意而公堂會議如不能言太祖益器重之在宥密常公服危坐如對君父接小吏亦以禮未嘗以名呼歸私第唯閉閤宴居不妄接賓客五鼓方罷已待漏於禁門矣雖霜雪不易其操如此者凡八年

愛信幼子

宋仁宗時宋庠為樞密使以鎮靜為治然愛信幼子縱

其與小人遊侍御史呂誨論庠昏惰罷判鄭州

務守成法

宋仁宗嘉祐六年以張昇為樞密使胡宿為副使宿為人清慎忠實顧惜大體羣臣多務更張革弊宿曰變法古人所難不務守祖宗成法而徒紛紛無益於治也

不按匿名

長興三年邢州汝州戍兵還見上訖於殿庭遺下匿名書論本指揮元霸率斂人錢物帝令張從實按問樞密

使范延光奏曰匿名文字准格不治禁訟端也不宜按問乃止

士卒相誇

宋狄青為樞密使每出入士卒輒指目以相矜誇至墜馬足不得行又其家有光怪會大水青避於相國寺行止殿上人情頗疑學士歐陽修言青掌國機密而得軍情非國家之利知制誥劉敞出知揚州陞辭亦言陛下幸愛青不如出之全其終始帝然之乃以使相判陳州

士民相慶

宋呂正獻公公著拜樞密副使初自河陽入朝都人環觀相謂曰此公還朝百姓之幸也至是士民相慶既受命出殿門武夫衛卒皆歡忭咨歎又慶歷初元昊納款遂召韓琦范仲淹為樞密副使天下聞之士夫皆酌酒相賀曰上用韓范非惟社稷之幸乃天下生民之幸

裁損冗兵

宋曾魯國宣靖公公亮字明仲拜樞密使公在政府修

紀綱除弊政數裁損冗兵又更制圖籍以周知四方兵數登耗及三路屯戍衆寡地理遠近

蒐補闕戍

宋歐陽公修為樞密副使公在兵府與曾魯公取天下兵數及三路屯戍多少更為圖籍凡邊防久闕屯戍者必加蒐補

不差毫釐

宋王文定公淮拜樞密使公在右府憂邊思職動中機

會號令賞罰明審平當上亦稱其毫釐不差

勿分彼此

宋韓世忠除樞密使上謂世忠曰朕付卿等以樞府本兵之權甚大宜合為一心勿分彼此則兵力全而莫之能禦顧如烏珠者又何足掃除乎

房暉避事

房暉與趙延壽同為樞密使時薛文遇劉延助居中用事每朝廷議事暉與學士環坐會議多於衆中俯首而

睡其避事如此

若水敢言

宋李繼隆與轉運使盧之翰有隙遂奏轉運乏軍興太宗怒召中使付三函令取之翰及某人首丞相呂端不敢言樞密副使錢若水爭之請先驗有狀然後行法上大怒拂衣起入禁中二府皆罷若水獨留廷中上既食久之使人偵視廷中有何人報云有細瘦而長者尚立馬上出詰之曰朕所以擢任以爾為賢耳乃不才如是

耶尚留此安俟對曰陛下不知臣無狀使得待罪二府
臣當不避死亡以報厚恩李繼隆外戚貴重莫比今陛
下據其一幅奏書誅三轉運使雖有罪天下何由知之
鞠驗事狀明白加誅何晚馬上意解乃召呂端等呂端
等奏請如若水議先令責狀三人皆黜為行軍副使

親賜隸字

宋夏竦為平章事臺諫交言其非改樞密使上親隸乘
險二字賜之初竦得二字憂懼既又賜文行忠信四字

以勉之疎方釋然

請定常例

宋大中祥符中詔樞密使帶檢校平章事者不告引止於本廳贊唱時王欽若陳堯叟上言請定常例先是曹彬以樞密使兼宰相不告引故用彬例

備殫忠勞

宋周文忠必大除樞密使上曰卿在西府備殫忠勞若有邊事宣撫使惟卿可他人不能也

周知世務

東都事畧李諂字仲詢諡憲成知樞密院事資性明達周知世務處劇若閑暇在樞府每仰僥倖號為稱職

願竭股肱

宋施大資點與樞密周公呈本院事上曰適來一二事卿等各陳所見甚關朝廷大體公復奏曰臣蒙陛下擢用自愧素飡疊蒙聖訓敢不竭股肱之力

可托腹心

宋呂公著復同知樞密院事神宗手詔曰顧在廷之臣有可以托中外腹心之寄均皇家休戚之重無踰卿者可亟起視事

階下謝衣

宋制大宴樞密副使不坐侍立殿上既而退就御厨賜食與閣門引進四方館使列坐廡下親王一人伴食每春秋賜衣門謝則與內諸司使副班于庭中故朝中語曰厨中賜食階下謝衣蓋樞密使唐時以內臣為之故

常與內使副為伍蓋沿革因循不能釐正也

道中奪印

宋曹利用天禧三年為樞密使後拜為鄆國公退朝歸私第道中有狂人奪其印以為不祥未幾以姪訥所累而貶死天下寃之

義倫清廉

宋沈義倫為隨軍轉運使入成都獨居僧寺蔬食偽蜀有以珍寶為獻者皆却之東歸纔圖書數卷上聞其清

廉擢為樞密副使

韓絳忠直

言行錄宋韓琦初罷相上問誰可為執政者公力薦韓絳忠直有公輔器上遂用為樞密副使既而有排毀絳者上曰韓琦之去惟薦此人朕豈可違

文資充使

宋太平興國六年以樞密副使石熙載為戶部尚書充樞密使以文資正官充使自此始也

儒臣為使

宋大中祥符五年以知樞密院王欽若陳堯叟同中書門下平章事充樞密使以儒臣為樞使樞使兼宰相自此始也

持法守正

宋王文忠公堯臣為樞密副使持法守正以身任天下之事凡濫恩倖者請各隨其事可損損之可絕絕之至其大者皆著為定令在位六年廢墜修舉皆有條理

阿意希旨

宋王沔臨事明察有通時之用然頗事苛碎深刻不以至誠待人又能阿意希旨以自固祿位與張齊賢同任樞府副使頗不協

獨削題名

宋錢惟演見丁謂當國因附之與為婚姻寇準之貶惟演有力焉及序樞密題名獨削去準姓氏云逆準不書御史中丞蔡齊言於真宗曰寇準忠義聞天下豈可為

奸黨所誣哉帝遽令磨去之

力辭讀冊

宋仁宗至和元年張貴妃卒追冊為溫成皇后使樞密副使孫沔讀冊宰相護葬沔曰陛下若以臣沔讀冊則可以樞密副使讀冊則不可遂求罷乃知杭州

能遠權勢

宋王貽永尚真宗女鄭國公主自以祖宗來無外嫺輔政者懼寵祿過盛故也貽永在樞府十五年能遠權勢

仁宗由是益加尊禮

悉通兵法

初范仲淹授狄青以左氏春秋且曰將不知古今匹夫
勇耳青由是折節讀書悉通秦漢以來將帥兵法至仁
宗皇祐四年自知延州召拜樞密副使又宋張浚幼有
大志及為熙河幕官徧行邊壘覽觀山川形勢時與舊
戍將握手飲酒問祖宗以來守邊舊法及軍陣方畧之
宜故一旦起自疏遠當樞筦之任悉能通知邊事本末

故在京城中國親見二帝北行皇族繫虜生民塗炭誓不與虜俱存故終身不主和議

二府對持

見沿革

三省同議

呂源明家塾廣記宋神宗改官制凡大事三省與密院同議進呈畫旨稱三省樞密院同奉聖旨三省官皆同簽付樞密院行之小事密院獨取旨行訖關三省每朝

三省樞密院先同對樞密退待於殿廬三省始留進呈
三省事退樞密院再上進呈獨取旨遂為定制又曰常
事密院自行至涉邊事則三省聚議謂之開南廳

升之三至

宋熙寧元年文彥博呂公弼為樞密使韓絳邵亢為副
使時陳升之三至樞府神宗欲稍異其禮乃以為知院
於是知院與使副並置矣元豐改官制議者欲廢密院
歸兵部神宗曰祖宗不以兵柄歸有司故專官統之互

相維制不從然以樞密聯職輔弼非出使之名乃定置
知院同知院二人餘悉置職事亦多所釐正細務分隸
六曹專以邊機軍政為職而契丹國信民兵牧馬猶總
領焉

德用再入

長編王德用武臣也宋仁宗朝再入樞府為使是時富
弼偕契丹使來德用伴射使者曰天子以公典樞密而
用富公為相可謂得人矣

總尚書

附令僕

六部之名始於隋開皇三年改度支尚書為民部都
官尚書為刑部命左僕射判吏禮兵三部事右僕射
判民刑工三部事

納言

虞書帝曰龍朕聖讒說殄行震驚朕師命汝作納言夙
夜出納朕命惟允

主計

周禮注司會主天下之大計六官之長若今之尚書又南史陳後主授江總尚書令冊文文昌政本司會要經常彪謂為樞機李固方之斗極

發書

通典秦時少府遣吏四人在殿中主發書故謂之尚書尚猶主也漢初有尚冠裳衣等六尚書是也

典制

袁宏漢書伏湛拜尚書典定舊制

僊臺

續漢官志尚書省在神僊門內故王均和贈劉尚書詩
客館動秋光僊臺起寒霧

天府

隋百官志尚書出納王命敷奏萬幾蓋政令之所由宣
選舉之所由定罪賞之所由正斯乃文昌天府唐光宅
元年改尚書省曰文昌臺俄改曰文昌都省

畫省

漢官典職尚書省以胡粉塗壁畫古賢臣烈士重行書讚故曰畫省

禁闈

李充懷秋賦在中秋之遙夜兮直建禮之禁闈

四曹

漢成帝建始四年罷中書宦者又置尚書四人一人為僕射而四人分為四曹掌圖書秘記章奏之事各有其任一曰常侍曹二曰二千石曹三曰民曹四曰主客曹

又置三公曹是為五曹光武又置三公曹改常侍曹為吏部曹又置民曹客曹二千石曹中都官曹合為六曹是時尚書雖有曹名不以為號靈帝以侍御梁鵠為選部尚書始以曹為號至魏改選部為吏部又有吏部左民客五兵度支曹凡五曹晉置吏部三公客曹馬部屯田度支為六曹而無五兵及渡江後有吏部祠部五兵左民度支五尚書宋齊梁陳各有六尚書又有起部尚書起部不常置興立宮廟則權置畢則省之唐龍朔二

年改尚書為太常伯

八座

東漢光武分為六曹并一令一僕射謂之八座魏有五曹與二僕射一令謂之八座

左轄

柳子厚為樊左丞遜官表天上尊北斗中樞陛下有文昌左轄

中臺

東漢蔡邕亡命江海十二年董卓辟之署祭酒甚敬重
三日之間周歷三臺遷為侍中注云漢以尚書為中臺
謂者為外臺御史為憲臺邕初署祭酒補侍御史又轉
侍書御史後遷尚書故曰三臺

簪筆

索子正書尚書佩挈刀囊執板笏簪筆又周捨問劉杳
尚書挈囊竟何所出答云張安世傳挈囊簪筆事武帝
數十年注云囊索也近臣簪筆以待顧問

屬杯

北史後魏肅宗舉觴謂羣臣曰素尚書朕之杜預故以
杯屬元凱侍坐者莫不仰羨

委珠

見賞賜

賜劍

東觀漢記章帝賜尚書劍各一手自署姓名韓稜楚龍
泉郅壽蜀漢文劍陳寵濟南鍛成一室兩刃其時論者

以為韓稜淵深有謀故得龍泉郅壽明達有文章故得
文劍陳寵敦素有善於內不見於外故得鍛成劍皆因
名而表意

呵虎責置弓

張璠漢紀朱穆拜尚書正月百官朝賀畢有虎責當陛
下置弓於地曰此天子弓誰敢干越穆乃呵之曰天子
弓當載之盾首之上乃敢置地大不敬即收虎責付獄
治罪莫不肅然

勅虎賁奪劔

東漢張陵為尚書歲朝梁冀帶劔入省陵叱冀出勅虎賁奪其劔百僚肅然冀弟不疑曾舉陵孝廉謂曰昔之舉君所以自罰也陵曰今申公憲以報私恩

閑練舊典

益部耆舊傳李固薦左雄閑練舊典且有幹用宜在機密特拜尚書

明習故事

東漢侯霸字君房光武時拜尚書時無典政朝廷又少
近臣霸明習故事收錄遺文每春下寬大之書奉四時
之令皆霸所建也

黃琬廉貞

續漢書黃琬為尚書方毅廉貞

魏朗蹇諤

謝承後漢書魏朗字少英入為尚書蹇諤禁省不屈豪

右

辭老

晉山濤轉尚書表辭年老詔曰方今多事嘉謀良圖委以老成

諫寬

晉胡威為尚書嘗諫時政之寬晉武帝曰尚書郎以下吾無所假借威曰臣之所陳豈在丞郎令史正謂如臣等輩始可以肅化明法耳

宜擇修潔

唐高憑字季輔貞觀初上五事曰如尚書八座人主之所責成者也宜擇溫厚修潔者任之尚朴素華浮偽使家識孝慈人知廉耻自然禮節興矣

妙選德望

唐玄宗欲用牛僊客為尚書張九齡諫曰尚書古之納言有唐以來多用舊相居之不然則歷踐內外清貴之地妙選有德望者充之僊客本河湟一使典耳拔升清流齒班常伯此官邪也

賜祿終身

東漢鄭均為尚書澹泊無欲以病乞骸骨終不肯起章
帝車駕幸均舍勅賜尚書祿終其身時人號曰白衣尚
書

試政補闕

東漢翟酺時尚書有闕詔將大夫已上試對政事第一
及天文道術第一者補之由是酺對第一拜尚書

統憲分憂

唐柳子厚謝襄陽李夷簡尚書啓伏惟尚書鵠立朝端
風行天下入統邦憲出分主憂控此上游式是南服海
內奔走之士思欲修容於轅門之外躡履於油幢之間
譬之涉蓬瀛登崑閬不可得而進也

賜服佩魚

會要元豐五年四月詔六曹尚書依翰林學士例六曹
侍郎給事中依直學士例朝謝日不以行守試並賜服
佩魚罷職除他官日不帶行

六卿之任

魏志八座尚書即古六卿之任也

萬事之本

晉康帝詔尚書萬事之本朕所責成也

喉舌

見星

機衡

東漢郎顗傳尚書職在機衡宮禁嚴密

並用士人

已下尚書令

應劭漢官儀尚書令秦官也漢初並用士人銅印墨綬

秩二千石

不接賓客

東漢陳蕃字仲舉為豫章太守性方峻不接賓客徵為尚書令送迎不出廊門

能識亡書

漢張安世以父任為郎天子行幸河東嘗亡書三篋詔

問莫能知唯安世識之後購求得書以相較一無所遺
失上奇其才擢尚書令

焚毀故案

荀彧字文若為尚書令嘗以書陳事臨薨皆焚毀故案
奇策密謀不得與聞

止帝出遊

東漢申屠剛字巨卿遷尚書令光武欲出遊剛以隴蜀
未平不宜逸豫諫不聽遂以頭軻乘輿輪使馬不得前

遂止

諫帝案行

魏文帝嘗卒至尚書門尚書令陳矯跪問陛下欲何之
帝曰欲案行文書耳矯曰此臣之職分非陛下所宜臨
也帝即迴車

專席

東漢尚書令與司隸校尉御史中丞皆專席坐京師號
曰三獨坐言其尊重也

撫牀

晉衛瓘為尚書令是時朝野咸知太子昏愚瓘欲陳啓而未敢發會侍宴凌雲臺瓘陽醉跪晉主牀前因以手撫牀曰此座可惜晉主意悟因謬曰公真大醉耶

課式令吏

魏荀彧為尚書令課式令吏覈其才能有關於文法不能決疑處事者即時遣出帝嘗謂曰魏武帝有言荀文若進善不進不止荀公達退惡不退不休

侵毀公卿

晉刁協為尚書令協性剛悍與物多忤與侍中劉隗俱為元帝所寵任欲矯時弊每崇上抑下排沮豪強故為王氏所疾而協又使酒侵毀公卿見者側目

古弼遠慮

綱目魏主詔以肥馬給獵騎尚書令古弼留守悉以弱馬給之魏主大怒欲還臺斬之弼官屬恐并坐誅弼曰吾為人臣不使人主盤於遊田其罪小不備不虞乏軍

國之用其罪大今蠕蠕方強南寇未滅吾為國遠慮雖死何傷且吾自為之非諸君之憂也魏主聞之嘆曰有臣如此國之寶也賜衣一襲

尚之令譽

綱目宋文帝以何尚之并子偃素有令譽自居劬朝用智將迎時有全脫故特免之後復以尚之為尚書令偃為大司馬長史

受職不讓

晉王述每受職不為虛讓及為尚書令子坦之白述故事當讓述曰汝謂我不堪耶對曰非也但克讓自美事耳述曰既謂之堪何為復讓人言汝勝我定不及也

治身無嫌

唐約字仲謙拜尚書令處官任職不言貨利之事當公法不阿所私京師號曰治身無嫌唐仲謙

省讀文書

漢後主延熙中國務煩猥費禕為尚書令省讀文書舉

目究意終亦不忘常以朝晡聽事其間接納賓客飲食博戲盡人之歡而事無廢闕及董允代禕始欲數之旬日之中已多愆滯乃嘆曰人才相遠如此非吾所及也乃聽事終日而猶有不暇焉

獨勤簿領

梁武帝大同四年以何敬容為尚書令自晉宋以來宰相皆以文義自逸敬容獨勤簿領日旰不休為俗所嗤

常用皂檐

已下尚書僕射

東觀漢記鮑永字君長拜尚書僕射行將軍事將兵安
集河東永好文德雖行將軍事然常用皂襜路人稱鮑
尚書兵按永宣之子

每曳革履

漢鄭崇字子游為尚書僕射數諫諍上納用之每見曳
革履上笑曰我識鄭尚書履聲東坡詩朝罷人人識鄭
崇直聲如在履聲中

請更弊法

魏陳羣以吏部不能審覈天下之事故令郡國及州各置中正取德充才盛者為之使銓次等級以為九品吏部憑以補授行之浸久中正或非其人姦弊日滋至晉武帝太康間尚書左僕射劉毅上疏言職名中正實為姦府事名九品實有八損宜罷中正更立一代之制

隱諱亂臣

晉孝武太元中博士范宏之論殷浩宜加贈諡因叙桓溫不臣之迹時尚書僕射王珣溫故吏也乃為隱諱言

溫廢昏立明有忠貞之節遂黜宏之為餘杭令

總侍郎

歷代沿革秦初置郎中令其屬官有三署五官中郎將左中郎右中郎將是也主執戟侍宮殿出充車騎漢官儀尚書郎初從三署郎選詣尚書臺試每一郎缺則試五人先試牋奏初入臺稱尚書郎

徵入中臺

韓愈贈馬侍郎詩紅旗照海壓南荒徵入中臺作侍郎

同到溫室

蘇東坡詩與君持橐侍帷幄同到溫室觀堯曩

總郎中員外郎

歷代沿革秦有郎中以其為郎侍衛居中故曰郎中
員外郎謂本員之外復置郎也西漢言郎者多非尚
書郎唯田蚡少為諸曹郎也至如馮唐為郎中署長
不疑盜同舍郎金顏駟為郎三世不遇揚雄為侍郎
及諸言以貲為郎父任為郎者並三署郎東漢有尚

書及曹名冠首者即尚書郎直言為郎者亦三署郎也魏晉已後無三署郎隋開皇中止置侍郎以隋諱忠不置郎中煬帝改曰郎唐改郎為郎中龍朔二年改為大夫咸亨光宅龍朔並隨曹改復宋元豐官制六曹郎官理郡守以上資任者為郎中通判以下資序者為員外郎

握蘭

應劭漢官儀尚書郎俯伏奏事黃門郎對揖跪受故稱

尚書郎懷香握蘭趨走丹墀是也宋百官志漢尚書郎口含鷄舌香以其奏事答對欲使氣息芬芳也故杜詩馨香粉署妍

起草

百官制尚書郎主作文書起草更直於建禮門內又春明退朝錄禮部郎中掌省中文翰謂之南宮舍人百日內須知制誥

賜筆墨

通典漢尚書郎月賜赤管大筆一雙隃麋墨一九

給帷帳

漢官儀尚書郎入直官給青縑白綾被或以錦被又給帷帳裯褥通中枕太官供食物湯官供餅餌及五熟果實之屬五日一美食下天子一等又給女侍史二人選端正者執香爐護衣服奏事明光殿

題柱

三輔決錄田鳳字季宗為尚書郎容儀端正入奏事漢

靈帝目送之因題柱曰堂堂乎京兆田郎

宿臺

類要黃香字文強為尚書郎常獨止宿臺上晝夜不離
省闈帝聞而善之

周密畏慎

類要徐防補尚書郎職典樞機周密畏慎在臺閣供職
十年奏事三世未嘗有過

寬博清白

東漢紀安帝元初六年詔中郎將選孝廉即寬博有謀
清白行高者出補令丞尉

馮唐孝廉

荀悅漢紀馮唐以孝廉著稱為郎中署長白首屈於郎
也續漢書胡廣字伯始舉孝廉為天下第一旬月拜尚
書郎恪勤職事兼理兩曹

杜軫威容

華陽國志杜軫為尚書郎威容可觀

覆被

三輔決錄漢章帝時馮豹為尚書郎每奏事未報嘗伏省下或自昏至明天子聞而嘉之使黃門持被覆之勅令勿驚按豹字仲文衍子也

坐帳

杜甫送湖南親知叨陪錦帳坐注云郎官有錦帳也

元士

常衮制郎官古之元士天下之務多所開決其於損益

大矣

佳吏

馮勤除為郎中每引進帝顧左右曰佳乎吏也

通階

漢虞詡曰臺郎顯職乃筮仕之通階

妙選

唐會要永昌五年勅六官分事四方取則尚書郎皆是妙選須稱職司馬方可為之

水鑑

晉書樂廣為尚書郎與何晏鄧颺等談論衛瓘見而奇之曰常恐微言將絕今復聞之命諸子造焉謂曰人之水鑑也每見此人瑩然如披雲霧而見青天

土山

談賓錄唐時諸郎不自員外郎拜者謂之土山頭趙謙先自彭州司馬入為大理正遂遷戶部郎中戶部員外賀遂涉嘲趙郎中云員外由來美郎中望不優寧知粉

署裏翻作土山頭
謙光答詩錦帳隨情悅
金爐任意爇
惟愁員外置不應
列星文

巨秀有量

晉書索靖字緄字巨秀
少有逸羣之量
靖每曰廊廟之才
非簡札之用
州郡吏不足汙吾兒也
遂舉秀才除郎中

哥奴非才

通典唐源乾曜執政其子潔為李林甫求司門郎中乾

曜素薄林甫乃曰郎官應得才望哥奴豈郎中才耶按
哥奴林甫小字

仰星文

唐蘇味道聞崔馬並拜臺郎詩曰遠從南斗外遙仰列
星文

分夜彩

唐韋莊南省伴直詩星分夜彩寒侵帳蘭惹春香綠映
袍

應宿

見星

積星

東漢楊秉上疏太微積星名為郎位晉天文志南宮二十五星在帝位東北一曰哀烏郎府三省郎中是其職也漢官儀郎見尚書對揖曰明時郎

兄弟同省

唐常叔諧貞觀中為庫部郎中與弟吏部郎中叔謙兄

主爵郎中李武同省時號三列宿

父子踐署

舊唐書常虛心父子兄弟更踐郎署時稱郎官家

置水明意

通典孔若思擢明經歷庫部郎中嘗曰仕宦至郎中足矣座右置水一石明自足意

抱被知高

晉魏舒字陽元為尚書郎時郎選或有非其人者論者

欲沙汰之舒曰吾即其人也抱被逕出同僚素無清論者咸有愧色談者莫不詠其高

四十不遂

唐元稹授羅讓員外制昔陶宏景一代之高人始願四十為尚書郎而猶不遂國朝選者尤用其良

三世不遇

漢顏驄為郎三世不遇

掌籍

通典隋開皇三年尚書二十四司各置員外郎一人掌其曹之版籍侍郎闕則釐其曹事又員外謂之散郎亦謂副郎故王鼎制陟中臺之局置副郎之聯雍明遠制俾升文昌用副郎選

判曹

通典晉宋以還尚書省置員外郎分判曹局唐朝彌重其選

風流誰繼田郎

唐鄭谷和王員外晴雪早朝詩紫微晴雪帶恩光遶仗
偏隨鴛鴦行長信月留寧避曉宜春花滿不飛香獨看
積素凝清禁已覺輕寒讓太陽題柱盛名兼絕唱風流
誰繼漢田郎

風流不減杜陵

唐韓翃送鄭員外詩風流不減杜陵時五十為郎未是
遲孺子亦知名下士樂人爭唱卷中詩身齊吏部還多
醉心顧尚書自有期要路眼看知已在不應窮巷久低

眉


伯父為累

武太后命宰相選郎吏常嗣立薦岑羲為天官員外郎
曰但恨其伯父長倩為累太后曰苟或有才此何所累
按長倩先因諫立武承嗣為太子被誅故云為累

推官得除

續通典開成四年鹽鐵推官姚勗鞠問河陰詰吏得實
除職方員外郎右丞常溫上疏曰郎官朝廷之清選不

可以賞能吏



山堂肆考卷四十六